

A. Dombrowski,
Nova kanto

...

Ho! eksonu nova kanto
 Pri la lingvo Esperanto,
 Pri ligil' internacia,
 Revo nia, amo nia!
 Kreitaĵ' la plej mirinda,
 Vere estas ĝi laŭdinda
 De verkistoj, de poetoj,
 En poemoj kaj odetoj,
 Pli ol tondro de bataloj,
 Pli ol dolĉaj najtingaloj,
 Pli ol belaj aktorinoj,
 Pli ol fajfoj de maŝinoj,
 Pli ol oro la plej brila,
 Pli ol gloro senutila,
 Pli ol ĉiu, pli ol ĉio,
 Krom la amo kaj la Dio.
 Dum venonta la centjaro,
 Sciu esperantistaro,
 En Eŭropo, Ameriko,
 En Azio kaj Afriko,
 Kie ajn vi veturados
 Esperanton vi trovados,
 Sur la strato, en vagono,
 En hotelo, en salono
 Kaj eĉ en privata domo :
 Ĝin parolos ĉiu homo :
 Laboristo, profesoro,
 Kaj juĝisto, kaj doktoro,
 Kaj hebreo, kaj kristano,
 Kaj litovo kaj japano, –
 Kaj pereos la plendato :
 « Mi vin ne komprenas, frato ».
 Por ke venu tiu horo –
 Kune fratoj, al laboro!
 Jen per kanto, jen per vorto,
 Jen agante ĝis la morto,
 Servu ni al la afero,
 La plej bela sur la tero,
 Gardu ĝin de la forgeso
 Per parolo en la preso;
 Iru kiel apostoloj
 Ĝin prediki por popoloj,
 Kaj eksonu nia voko
 Sur la ter' en ĉiu loko,
 En vilaĝoj, en urbetoj,
 En lernejoj, en gazetoj,
 Kaj servantajn al la vero
 Nin fortigu la Espero.

Verkinto de tiu ĉi Esperanta poemo estas A. Dombrowski.

Arg-1017-2059 (2014-05-20 14:51:52)

Tiu ĉi kanto-teksto troviĝas en <http://edu.i-lo.tarnow.pl/esp/lern/librejo/0012/0008.php> kaj <http://esperantoilustrita.blogspot.e/2012/10/liro-esperantista-nova-kanto.html#!/2012/10/liro-esperantista-nova-kanto.html>. Pri la verkinto vidu ankaŭ: <http://esperanto.net/literaturo/autor/dambrauskas.html>.